

17 FEB 2003

NAM-Festival Filem

SAMBUTAN MENGGALAKKAN SEMPENA KLWFF 2003

KUALA LUMPUR, 17 Feb (Bernama) -- Menteri Penerangan Tan Sri Khalil Yaakob hari ini meninjau keadaan di Golden Screen Cinema (GSC) Mid Valley untuk melihat sambutan orang ramai terhadap filem-filem yang sedang ditayangkan bersempena Festival Filem Sedunia Kuala Lumpur (KLWFF) 2003.

Khalil yang diiringi Ketua Setiausaha kementeriannya Datuk Dr Arshad Hashim meluangkan masa lebih satu jam untuk melihat sambutan dan persiapan pihak pengurusan panggung.

Beliau juga meluangkan masa untuk menonton filem-filem yang sedang ditayangkan.

Ketika ditemui pemberita kemudiannya, Khalil berkata beliau berpuas hati dengan sambutan dan kerjasama pihak panggung yang telah menyediakan dua kaunter untuk memudahkan orang ramai mendapatkan tiket percuma untuk menonton.

"Untuk hari ini sambutan baik orang ramai yang datang termasuk pelajar-pelajar dan filem-filem yang ditayangkan juga menepati tema festival ini," katanya.

Khalil berkata untuk menganjurkan festival filem akan datang banyak perkara yang akan dilihat terutama daripada segi kelancaran perjalanan festival itu.

"Kita ramai pegawai, media dan seniman yang hadir dan kita akan cuba kumpulkan apa yang baik dan sebaliknya. Ia akan dijadikan sebagai rujukan apabila kita menganjurkannya di tahun-tahun akan datang," katanya.

Ketika diminta mengulas gesaan Perdana Menteri Datuk Seri Dr Mahathir Mohamad ketika melancarkan festival malam tadi yang meminta pengeluar-pengeluar filem menghasilkan filem yang mempunyai nilai-nilai yang baik dan tanpa keganasan, beliau berkata memang wajar pengeluar filem berbuat demikian.

Katanya daripada jumlah 12 filem yang dikeluarkan oleh penerbit setiap tahun, satu atau dua filem yang dikeluarkan itu akan bertemakan apa yang dikehendaki oleh Perdana Menteri.

"Ini bergantung pada skrip dan pihak yang ingin melabur pada filem itu. Ia juga akan melihat keupayaan filem-filem yang serius sama ada boleh diterima atau tidak oleh penonton," katanya.

Tinjauan Bernama di panggung GSC hari ini mendapati sambutan sangat menggalakkan daripada orang ramai yang telah beratur sejak 11 pagi untuk mendapatkan tiket-tiket percuma bagi tayangan filem selama dua hari itu.

Pengunjung Zulhisham Kahar, 27, berkata festival seperti itu dapat menunjukkan Malaysia berkemampuan untuk menganjurkan festival yang besar seperti itu.

Beliau berkata peluang seperti itu jarang didapati terutama untuk menonton filem-filem dari luar.

"Walaupun bekerja hari ini saya mengambil peluang waktu rehat untuk datang menonton," katanya.

Beliau berkata filem dari negara Perancis dan England menjadi pilihannya.

Seorang pelajar yang hanya dikenali sebagai Eesiew, 20-an berkata tayangan filem seperti itu akan mengeratkan budaya dari negara-negara luar.

"Saya ingin menonton filem Iran untuk mengetahui budaya masyarakat mereka kerana Iran jauh dari kita dan sukar untuk mengetahui budaya mereka, melalui filem hubungan itu akan dapat dipereratkan," katanya.

-- BERNAMA

KK AHH RHM